




ხაშურის მთაშენი



№35 (236)

17 სექტემბერი, სამშაბათი,

2019 წელი



ახალი სასწავლო წელი დაიწყო

ისევე, როგორც მთელი ქვეყნის მასშტაბით, ხაშურის მუნიციპალიტეტის სკოლებში სასწავლო წელი დაიწყო. ზემოთ შევგებნენ სკოლები მოსწავლეებს. იწყება შეუცნობლის შეცნობის გზების ძიება, იწყება ან გრძელდება ბილიკი, რომელსაც განათლებული ხალხის ქვეყნის მართვაში მოსვლა ჰქვია. ვულოცავთ ყველას ამ დღეს - პედაგოგებს, მოსწავლეებს, ახალწვეულებს, მშობლებს და ვუსურვებთ, რომ მთელი სასწავლო წელი ისეთივე ზემო ყოფილიყოს მათთვის, როგორც გუშინდელი დღე იყო.



მთავრობის ახალი მეთაური გუბერნატორებს შეხვდა

რეგიონებში, ჩვენი მოქალაქეებისთვის მთავრობის განსახიერება არის ის ჩინოვნიკი, რომელიც მათ პრობლემებს ან აგვარებს, ან - ვერა და ამ მიმართულებით გუბერნატორების პასუხისმგებლობა სრულად პერსონალიზებული იქნება, - ამის შესახებ საქართველოს პრემიერ-მინისტრმა გიორგი გახარიამ სახელმწიფო რწმუნებულებთან შეხვედრისას განაცხადა.

მთავრობის მეთაურმა ხაზი გაუსვა პრობლემების მოკლე ვადებში მოგვარების აუცილებლობას და გუბერნატორებს დროში გაწერილი კონკრეტული სამოქმედო გეგმის უახლოეს პერიოდში წარმოდგენა დაავალა.

„აუცილებელია, ვიმოქმედოთ სწრაფად, ეფექტიანად და რაც მთავარია, ეს ყველაფერი უნდა იყოს გამყარებული კეთილსინდისიერი ქმედებით. არავის აქვს იმის რესურსი, რომ კიდევ დიდხანს გველოდოს. ამიტომ, განსაკუთრებით თქვენს შემთხვევაში, პასუხისმგებლობა სრულად პერსონალიზებული იქნება. უახლოეს დღეებში უნდა განსაზღვროთ რეგიონებში არსებული სისტემური პრობლემების სტატუსი და წარმოადგინოთ კონკრეტული გაპრობლემებული საქმეები, შემდგომ კი - პირდაპირი, დროში გაწერილი გეგმა და კონკრეტული პასუხისმგებლობები. თქვენი ძირითადი ამოცანაა პრობლემების მოგვარება და არა - პრობლემების შექმნა“, - მიმართა პრემიერ-მინისტრმა გუბერნატორებს.

მთავრობის სხდომა

სურამს განაშენიანების გენერალური გეგმა ექნება

მთავრობის სხდომაზე გამოტანილ საკითხებს შორის ერთ-ერთი თემა დაბა სურამის გენგეგმის შემუშავება იყო. როგორც რეგიონული განვითარებისა და ინფრასტრუქტურის მინისტრმა მაია ცქიტიშვილმა აღნიშნა, სივრცითი მოწყობის ფარგლებში სამინისტრო ახორციელებს ტურისტულად მნიშვნელოვანი, პოტენციურად საინტერესო ლოკაციების სივრცითი მოწყობის გეგმებს, რაც გულისხმობს ამ ტერიტორიებისთვის ახალი ფუნქციების მოძიებასა და არსებული ფუნქციების აღდგენას.

„ეს ძალიან მნიშვნელოვანია მათ ტერიტორიებზე განაშენიანების ის-



ეთი სახის რეგულირებისთვის, რომელიც მოსახლეობას საშუალებას მისცემს, რომ იქ სრულფასოვანი საერთაშორისო სტანდარტების მქონე კურორტები ჩამოყალიბდეს. ამასთან, განვითარების გეგმების შესაბამისად სამინისტრო დონორების დახმარებით და სახელმწიფო ბიუჯეტით უკვე ახორციელებს იმ ინფრასტრუქტურულ პროექტებს, რომლებიც საჭიროა ამა თუ იმ დასახლებისთვის ასეთი სახის კურორტად ჩამოყალიბებისთვის“ - აღნიშნა მაია ცქიტიშვილმა.

რეგიონული განვითარებისა და ინფრასტრუქტურის სამინისტრო დაბა სურამის საკურორტო ფუნქციის განვითარების მიზნით, ქალაქმშენებლობითი გეგმების შესამუშავებლად საპროექტო მომსახურების მიმწოდებლის შესარჩევ კონკურსს აცხადებს.

ამის შესახებ განკარგულემა საქართველოს მთავრობამ გამოსცა, საფუძველი კი ხაშურის მუნიციპალიტეტის მერიის წერილობითი თხოვნა გახდა.

დასაგეგმარებელი ტერიტორიის საორიენტაციო საზღვრებში, კონკურსში გამარჯვებული კომპანია ვალდებული იქნება მოამზადოს დაბა სურამის გენერალური და ცენტრალური უბნის განაშენიანების გეგმების პროექტები, ასევე გარემოსდაცვითი შეფასების კოდექსით გათვალისწინებული დოკუმენტაცია.

1948 წელს სურამი რესპუბლიკური მნიშვნელობის კურორტად გამოცხადდა. უნიკალური ბუნებრივი კლიმატი, მისი გეოგრაფიული მდებარეობა დაბას ადვილად მისადგომს ხდის როგორც აღმოსავლეთ, ისე დასავლეთ საქართველოში მცხოვრებთათვის. სურამში ბევრი კულტურული ძეგლია, რომელიც ტურისტებისთვისაა საინტერესო.

რადგან სურამს არ გააჩნია გენერალური გეგმა, არსებობს საფრთხე, რომ ტურისტების გაზრდილი რაოდენობის ფონზე აქტიური სამშენებლო საქმიანობები, უსისტემო განაშენიანება ზიანს მიაყენებს დაბას. ამიტომ, დღის წესრიგში დადგა მდგრადი განვითარების პრინციპებზე დაფუძნებული ქალაქმშენებლობითი გეგმების შემუშავების აუცილებლობა. კურორტის აღორძინებისა და განვითარების ხელშეწყობის მიზნით, ასევე, მნიშვნელოვანია მოხდეს ცენტრის ფუნქციის მატარებელი საზოგადოებრივი სივრცის განსაზღვრა და დაგეგმარება.

განაშენიანების გეგმების შემუშავებისას პრიორიტეტულად გასათვალისწინებელი საკითხებია - კურორტის ბუნებრივი პირობებისა და მინერალური წყლების გონივრულად გამოყენება, სურამის საბაჟო კურორტის ფუნქციის აღორძინება, ადმინისტრაციულ-საზოგადოებრივი ცენტრის კომპლექსურად მოწესრიგება, არქიტექტურულ-ესთეტიკური იერ-სახის გაუმჯობესება, ქალაქის სამშენებლო სამუშაოების წარმოების რისკის შემცირება, ებრაელთა უბნისა და სინაგოგის არსებული ვითარებისა და შესაძლებლობების ანალიზი, სურამის რკინიგზის სადგურის რეკონსტრუქცია, ე. წ. ბრაუნფილდის - არსებული და მიტოვებული სამრეწველო ობიექტების პერსპექტივის განსაზღვრა.

ხაშურის მუნიციპალიტეტის საკრებულოს

განკარგულება # 81

2019 წლის 3 სექტემბერი, ხაშური

ხაშურის მუნიციპალიტეტის საკრებულოს 2019 წლის მეოთხე კვარტლის სამუშაო გეგმის დამტკიცების შესახებ

ხაშურის მუნიციპალიტეტის საკრებულოს 2018 წლის 7 დეკემბრის ბიუროს სხდომაზე დამტკიცდა საკრებულოს კომისიების წლიური სამუშაო გეგმები, რომელთა საფუძველზეც შემუშავდა საკრებულოს მეოთხე კვარტლის სამუშაო გეგმა, რაც ხაშურის მუნიციპალიტეტის საკრებულოს 2014 წლის 14 ივლისის „ხაშურის მუნიციპალიტეტის საკრებულოს რეგლამენტის დამტკიცების შესახებ“ №22 დადგენილების მე-3 მუხლის მე-3 პუნქტის „ვ“ ქვეპუნქტისა და 50-ე მუხლის 1-ლი პუნქტის შესაბამისად, საჭიროებს საკრებულოს სხდომაზე დამტკიცებას.

საქართველოს ორგანული კანონი „ადგილობრივი თვითმმართველობის კოდექსის“ 61-ე მუხლის 1-ლი და მე-2 პუნქტების, მე-19 მუხლის „ბ“ პუნქტის შესაბამისად, ხაშურის მუნიციპალიტეტის საკრებულო ადგენს:

1. დამტკიცდეს ხაშურის მუნიციპალიტეტის საკრებულოს 2019 წლის მეოთხე კვარტლის სამუშაო გეგმა დანართის შესაბამისად. (დანართი თან ერთვის 1 ფურცლად);
2. განკარგულება ძალაში შედის ხაშურის მუნიციპალიტეტის საკრებულოს ვებგვერდზე www.khashuri.org.ge გამოქვეყნებისთანავე;
3. განკარგულება ეცნობოს ხაშურის მუნიციპალიტეტის მერიას.
4. განკარგულება შეიძლება გასაჩივრდეს დაინტერესებული პირის მიერ მისი გაცნობის დღიდან ერთი თვის ვადაში, სარჩელის წარდგენის გზით, ხაშურის რაიონულ სასამართლოში (მის: ხაშური, მერაბ კოსტავას ქ. № 15)

საკრებულოს თავმჯდომარე მიხეილ ჯანაშვილი

				დანართი
ხაშურის მუნიციპალიტეტის საკრებულოს 2019 წლის მეოთხე კვარტლის სამუშაო გეგმა				
N	საკრებულოს სხდომაზე განსახილველი საკითხების დასახელება	განხილვის დრო	მომხსენებელი	პასუხისმგებელი საკითხის მომზადებაზე
1	2	3	4	5
1	ხაშურის მუნიციპალიტეტის მერიის შიდა აუდიტის სამსახურის მიერ 2019 წლის სამ კვარტალში გაწეული მუშაობის შესახებ	ოქტომბერი	მერიის შიდა აუდიტის სამსახურის უფროსი	საკრებულოს სამანდატო, საპროცედურო საკითხთა და ეთიკის კომისია
2	ხაშურის მუნიციპალიტეტის მერიის ადმინისტრაციული სამსახურის მერის წარმომადგენლების საქმიანობის კოორდინაციის განყოფილების ანგარიში 2019 წლის 10 თვეში გაწეული საქმიანობის შესახებ	ნოემბერი	მერიის ადმინისტრაციული სამსახურის მერის წარმომადგენლების საქმიანობის კოორდინაციის განყოფილების უფროსი	საკრებულოს ქონების მართვისა და ბუნებრივი რესურსების საკითხების კომისია
3	ხაშურის მუნიციპალიტეტის მერიის ჯანმრთელობის დაცვისა და სოციალურ უზრუნველყოფის სამსახურის მიერ 2019 წლის 11 თვეში გაწეული საქმიანობის შესახებ	დეკემბერი	მერიის ჯანმრთელობის დაცვისა და სოციალური უზრუნველყოფის სამსახურის ხელმძღვანელი	საკრებულოს სოციალურ საკითხთა კომისია

ა(ა)იპ "ხაშურის მუნიციპალიტეტის საზოგადოებრივი ჯანდაცვის ცენტრის" 2019 წლის 8 თვის შესრულებული სამუშაოს ანგარიში

აიპ "ხაშურის მუნიციპალიტეტის საზოგადოებრივი ჯანდაცვის ცენტრი" დაფუძნდა 2010 წლის 24 დეკემბერს ხაშურის მუნიციპალიტეტის საკრებულოს №163 განკარგულების საფუძველზე.

ხაშურის მუნიციპალიტეტის საკრებულოს 2018 წლის 14 დეკემბრის №113 განკარგულებიდან გამომდინარე, დაევალია ხაშურის მუნიციპალიტეტის საზოგადოებრივი ჯანმრთელობის 2019 წლის მუნიციპალური პროგრამის განხორციელება.

- კერძოდ:
- მუხლი 2. სანიტარული და ჰიგიენური ნორმების დაცვის ზედამხედველობა;
 - მუხლი 3. პრევენციული და ეპიდემიოლოგიური კონტროლის ღონისძიებები;
 - მუხლი 4. მოსახლეობის ჯანმრთელობისათვის უსაფრთხო გარემოს შექმნის ღონისძიებები

მუხლი 5. მოსახლეობის ცხოვრების ჯანსაღი წესის დამკვიდრების ხელშეწყობის ღონისძიებები

ხაშურის მუნიციპალიტეტის საზოგადოებრივი ჯანმრთელობის დაცვის 2019 წლის პროგრამით გათვალისწინებული გასატარებელი ღონისძიებების ფარგლებში, შემოწმებული იქნა ხაშურის მუნიციპალიტეტის ტერიტორიაზე არსებული ყველა საბავშვო ბაგა-ბაღის სანიტარულ-ჰიგიენური და სანიტარულ-ტექნიკური მდგომარეობა, რაცდამაკმაყოფილებელია და გაიცა შესაბამისი რეკომენდაციები.

მუნიციპალიტეტის ტერიტორიაზე, აღნიშნულ პერიოდში, ეპიდსიტუაცია დამაკმაყოფილებელია. დაფიქსირდა შემდეგი ინფექციები: ყვიანახვალა-1 (2018-5), წითელა-22(5), ჰეპატიტი „ბ“- 17 (8) (6 ორსული), ჰეპატიტი „ც“-59 2 ორსული(45) ჩუტყვავილა-82(232), ბრუცელოზი-1 (3), სავარაუდო დიარეული დაავადება-74 (186) ჰემორაგიული ეშერიხია 2 ლაბ. დასაბუთებული-სურამი, ტუბერკულოზი16(18) მ.შ. 12- +. ყველა შემთხვევა შეტანილია "დეიზის" სპეციალურ ბაზაში. ჩატარებულია ეპიდემიოლოგიური კვლევები ბრძანება №55/ო-ს შესაბამისად. კვლავ მომატებულია „ც“ ჰეპატიტის შემთხვევების რაოდენობა, რაც ელიმინაციის სახელმწიფო პროგრამით ჩატარებული სკრინინგული კვლევების შედეგია. სულ რაიონში, გამოკვლეული, ამ პერიოდში, 1494 პიროვნება (28 დაინფიცირებული), მათ შორის, ცენტრის სკრინინგი ჩატარდა 65 პიროვნებას, დადებითი შედეგი არ გამოვლინებულა, დაავადებათა კონტროლის მიერ მოწოდებული იქნა 82 პაციენტი, რომელთაც გამოვლენი ჰქონდა ც ჰეპატიტი და სამკურნალოდ არ გამოცხადდა. მათგან მოძიებული იქნა 80% და გაგზავნილი იქნა შემდგომ მკურნალობაზე. ივგებება სამი დაავადების ც ჰეპატიტის, შიდსის და ტუბერკულოზის პილტური კვლევების ჩატარება მუნიციპალიტეტის მასშტაბით, რომელიც დაფინანსდება მერიის მიერ.

ჰელმინთოზების გამოვლენის მიზნით, გამოკვლეული იქნა ხაშურის მუნიციპალიტეტის საბავშვო ბაგა ბაღის 1111 (2018წ-845) აღსაზრდელი. ინვაზირებული აღმოჩნდა 107(89) (76-ენტერებიუსით, 31 ასკარიდოზით). ინვაზირებულ პაციენტებსა და მათი ოჯახის წევრებს ჩატარდათ ექიმ პარაზიტოლოგის კონსულტაცია და დაენიშნათ მკურნალობა, გაიცა მედიკამენტები უსასყიდლოდ (მებენდაზოლი).

ცხოველების მიერ დაზარალებულ პირთა რაოდენობა საანგარიშო პერიოდში დაფიქსირდა 533. მ.შ. 350-პატრონიანი და 183-მოხეტიალე ცხოველით. ყველა მათგანს ჩატარდა ანტირაბიული აცრების შესაბამისი კურსი. გაიხარჯა 1495 (2018წ-1549) დოზა ვაქცინა და 69 (2018წ-64) იმუნოგლობულინი (37 დაზარალებულზე). ყველა შემთხვევა ეცნობა სურსათის უვნებლობის, ვეტერინარიისა და მცენარეთა დაცვის ადგილობრივ სამსახურს ცხოველებში ეპიდკვლევების ჩასატარებლად. საანგარიშო პერიოდში, ანტირაბიული კაბინეტი მონარაგებული იყო ანტირაბიული ვაქცინისა და იმუნოგლობულინის საკმარის რაოდენობით.

2019 წლის ამ პერიოდში, რაიონის ტერიტორიაზე ვაქცინაცია მიმდინარეობდა "ცივი ჯაჭვის" წესების სრული დაცვით. მოცვის მაჩვენებლები შემდეგია: წყ-1 (1წლ.)-77%; წყ-2-63%; ჰეპსა-63% პოლიო5-59%; დტ-5-60%; ტდ-14-43%; ბ ჰეპატიტი-39%; ბცჟ-40% (შემცირდა შობადობის გადინების ხარჯზე) გრძელდება წითელას საწინააღმდეგო კამპანია, არაგემიურად აიცრა-1431 პიროვნება, შემოტანილია ვაქცინების საჭირო მარაგი. სექტემბრის თვიდან იწყება პაპილომა ვირუსის საწინააღმდეგო ვაქცინაცია (9-13წ.წ.გოგონებში). ასევე ყოველწლიურად ოქტომბრის თვიდან ივგებება რისკ ჯგუფების გრიპის საწინააღმდეგო ვაქცინაცია, დაზუსტდა რისკ ჯგუფების სავარაუდო რაოდენობა.

მონიტორინგი ჩატარდა ყველა სოფლის ამბულატორიას, ადგილზე შესწავლილი იქნა ეპიდსიტუაცია და ვაქცინაციის მიმდინარეობა. ჩატარებული ტრენინგებისა და შეხვედრების შედეგად, მედპერსონალთან და მშობლებთან, ვაქცინაციის მოცვის მაჩვენებლები გაუმჯობესდა.

„ც“ ჰეპატიტის ელიმინაციის სახელმწიფო პროგრამის ფარგლებში, მუნიციპალიტეტის ტერიტორიაზე მოფუნქციონირე სალონებში ჩატარდა მონიტორინგი (30 სალონი), გამოვლენილ დარღვევებთან დაკავშირებით მიეცათ რეკომენდაციები და გარკვეული დრო გამოსასწორებლად.

მიმდინარეობს მონიტორინგი თამბაქოს კანონის აღსრულებასთან დაკავშირებით. შემოწმდა 7 სამედიცინო დაწესებულება, 2 - კაფე-რესტორანი, 16-სავაჭრო ობიექტი, 15 - ავტოტრანსპორტი, 5 - სიღამაზის სალონი.

საანგარიშო პერიოდში ჩატარდა ცხოვრების ჯანსაღი წესის დამკვიდრებასთან დაკავშირებით სან. განათლებითი ლექცია-სემინარები, საჯარო სკოლების ლიდერებთან „ტუბერკულოზთან ბრძოლის მსოფლიო დღე“, 29 მარტი „საქართველო თამბაქოს გარეშე“. 22-28 აპრილი, მსოფლიო იმუნოზაციის კვირეული"(შეხვედრა სკოლის პერსონალთან, სამედიცინო პერსონალთან).

დ. ჩიჭოვანი,

ა(ა)იპ „ხაშურის მუნიციპალიტეტის საზოგადოებრივი ჯანდაცვის ცენტრის დირექტორი

თბილისში, საკრებულოს წევრ ქალთა ფორუმის მე-6 ყოველწლიური კონფერენცია გაიმართა, რომელსაც ფორუმის 150 წევრი დაესწრო. კონფერენციის მონაწილეებმა ეკონომიკურ და პოლიტიკურ საქმიანობაში ადგილობრივ დონეზე ქალების მონაწილეობის გაზრდის გზები განიხილეს. მონაწილეების თქმით, მუნიციპალური სერვისები მეტად უნდა იყოს მორგებული ქალების საჭიროებებზე. განსაკუთრებით ისეთ საკითხებში, როგორცაა სკოლამდელი განათლებისა და ბავშვზე ზრუნვის სისტემის გაუმჯობესება, პროფესიული განათლებისა და გადამზადების განვითარება და ქალების ხელშეწყობა შრომის ბაზარზე წარმატების მიღწევაში.

კონფერენციის ორგანიზატორი იყო საქართველოს მუნიციპალური მომსახურების უზრუნველყოფა ასოციაცია (MSPA), გაეროს განვითარების პროგრამის (UNDP) მხარდაჭერითა და ავსტრიის, დანიის, შვედეთისა და შვეიცარიის მთავრობების ფინანსური ხელშეწყობით. კონფერენციის მუშაობაში მონაწილეობა მიიღეს საკრებულოს წევრმა ქალებმა საქართველოს ყველა რეგიონიდან. დონისძიებას ასევე დაესწრნენ საქართველოს მთავრობის, პარლამენტის, სამოქალაქო საზოგადოებისა და საერთაშორისო ორგანიზაციების წარმომადგენლები.

მაღალი რანგის ქართველმა და უცხოელმა გამომსვლელებმა ხაზი გაუსვეს ფორუმის საკვანძო მნიშვნელობას საზოგადოებრივ ცხოვრებაში ქალთა როლის გაზრდისთვის. მათ ეკონომიკურ და პოლიტიკურ საქმიანობაში მეტი აქტიურობისკენ მოუწოდეს საქართველოს ქალებს და გამოთქვეს იმედი, რომ საქართველო მიადგენს გენდერულ თანასწორობას მმართველობის ყველა დონეზე.

“ქალების ხმა სულ უფრო ხმამაღლა ისმის საქართველოს პოლიტიკაში”, – განაცხადა თამარ ჩუგოშვილმა, საქართველოს პარლამენტის თავმჯდომარის პირველმა მოადგილემ და გენდერული თანასწორობის საბჭოს თავმჯდომარემ. “საკრებულოს წევრ ქალთა ფორუმი მნიშვნელოვანი პლატფორმაა, რომელიც ხელს უწყობს ქალთა როლის გაზრდას ადგილობრივ თვითმმართველობაში და გენდერული თანასწორობის მიღწევას გადაწყვეტილების მიღების ყველა დონეზე”. “ქალთა პოლიტიკური და ეკონომიკური გაძლიერება საკვანძო საკითხია როგორც დემოკრატიისა და ადამიანის უფლებების დაცვისთვის, ასევე, თანაბარი ეკონომიკური განვითარებისთვის, რომლის მიღმა არავინ უნდა დარჩეს”, – განაცხადა ულრიკ თიდესტრომმა, შვედეთის ელჩმა საქართველოსა და სომხეთში. “ყველამ ვიცით, რომ ქალები სათანადოდ ვერ იყენებენ თავის პოტენციალს როგორც საქართველოში, ასევე, ბევრ სხვა ქვეყანაში. ეს ვითარება სხვადასხვა სფეროში შეიძლება, როგორც ოჯახებში, ასევე, კერძო სექტორსა და ადგილობრივ თუ ეროვნულ პოლიტიკაში”, – აღნიშნა დანიელ მეელიმ, შვეიცარიის განვითარებისა და თანამშრომლობის სააგენტოს სამხრეთ კავკასიის რეგიონულმა დირექტორმა. “შვეიცარია მზადაა თავისი წვლილი შეიტანოს გენდერული თა-

ნასწორობის მიღწევაში და ქალთა როლის გაძლიერებაში, რაც ხელს შეუწყობს საზოგადოებისა და ეკონომიკის მდგრად განვითარებას”.

კონფერენციის მონაწილეებს, ასევე, მიმართეს არად ბენეკომ, ავსტრიის ელჩმა საქართველოში, და ელიზაბეტ რუდმა, აშშ-ის ელჩის მოვალეობის შემსრულებელმა საქართველოში.

ქალების დაბალი წარმომადგენლობა პოლიტიკაში საქართველოს ჯერაც გადაუწყვეტელი პრობლემაა. ქალთა წარმომადგენლობა ადგილობრივ თვითმმართველობაში 13 პროცენტს არ აღემატება. 64 არჩეული მერიდან მხოლოდ ერთია ქალი. 2016 წლის საპარლამენტო არჩევნების შედეგად, ოდნავ გაიზარდა ქალი პარლამენტარების რიცხვი, მაგრამ 15 პროცენტს ეს მონაცემიც არ გასცდენია.

საკრებულოს წევრ ქალთა ფორუმი, რომელიც 2013 წელს შვედეთის მთავრობისა და გაეროს განვითარების პროგრამის (UNDP) ხელშეწყობით შეიქმნა, ერთერთი მექანიზმია საქართველოს ქალების პოლიტიკური ჩართულობის გაზრდისთვის.

“აუცილებელია, რომ საზოგადოებამ გაიგოს და გაათავალისწინოს ქალების ხმა, მაგრამ ეს არა მხოლოდ სამართლიანობის დაცვას მოითხოვს”, – განაცხადა ლუიზა ვინტონმა, UNDP-ის ხელმძღვანელმა საქართველოში. “საჭიროა ისეთი სახელმწიფო სერვისების განვითარება, რომლებიც ყველას საჭიროებებზე იქნება მორგებული, ასევე აუცილებელია მოსახლეობის ყველა წარმომადგენლის ენერჯისა და შემოქმედებითი შესაძლებლობების გათავისუფლება. საქართველო სრულად გამოიყენებს თავის პოტენციალს, თუ ეკონომიკური და პოლიტიკური შესაძლებლობები უზრუნველყოფილი იქნება მისი ყველა მოქალაქისთვის”.

საკრებულოს წევრ ქალთა ფორუმის მე-6 კონფერენციის მონაწილეებმა ქვეყნის რეგიონებში არსებული ეკონომიკური და საგანმანათლებლო შესაძლებლობები და სახელმწიფოს მიერ დაფინანსებული პროგრამები განიხილეს. ასევე, იმსჯელეს პროფესიულ განათლებაზე და გადამზადებაზე, სკოლამდელ განათლებაზე და ჯანდაცვის სერვისების ხელმისაწვდომობაზე.

საქართველოს რეგიონული განვითარებისა და ინფრასტრუქტურის სამინისტროს წარმომადგენლებმა ისაუბრეს დეცენტრალიზაციის რეფორმის ძირითად მიმართულებებზე და ამ ძირეული გარდაქმნის მნიშვნელობაზე მმართველობის ყველა დონეზე გენდერული თანასწორობის მიღწევის საქმეში.

ხაშურის მუნიციპალიტეტიდან კონფერენციის მუშაობაში მონაწილეობდნენ: მუნიციპალიტეტის საკრებულოს სოციალურ საკითხთა კომისიის თავმჯდომარე ირინე გელაშვილი, სამანდატო, საპროცედურო საკითხთა და ეთიკის კომისიის თავმჯდომარე ანა ხარებავა, ფრაქცია „ევროპული საქართველო-ლეიბორიტების“ თავმჯდომარის მოადგილე ნატო კიკაძე, საკრებულოს წევრები: მაყვალა მისიურაძე და ელზა კიკაძე.



სოფელ ბეკამსა და გვერდისუბნის დასახლებებში, გზების მოასფალტების სამუშაოების პროექტი ხორციელდება

9 სექტემბერს, ადგილზე იმყოფებოდნენ და სამუშაოების მიმდინარეობას ეცნობოდნენ ხაშურის მუნიციპალიტეტის მერი გიორგი გურასპაშვილი, მერის მოადგილე ზურაბ როსებაშვილი და ინფრასტრუქტურის განყოფილების ხელმძღვანელი გიორგი პაპიაშვილი. მათი განმარტებით, პროექტს მთლიანად ადგილობრივი ბიუჯეტი აფინანსებს და მისი ჯამური ღირებულება 960 555 ლარს შეადგენს. სურამსა და გვერდისუბანში, მოასფალტებული გზებით, 1500-ზე მეტი ადგილობრივი და დამსვენებელი ისარგებლებს, რაც მათ საყოფაცხოვრებო პირობებს მკვეთრად გააუმჯობესებს.

სოფელ მცხეთიჯვრიდან სოფელ ნალვლაძელ გზის მოასფალტების სამუშაოები აქტიურად გრძელდება

ინფრასტრუქტურული სამუშაოები, ადგილზე მონახულეს ხაშურის მუნიციპალიტეტის მერი გიორგი გურასპაშვილი, მერის მოადგილე ზურაბ როსებაშვილი და ეკონომიკური განვითარების სამსახურის უფროსმა სერგო ლალიაშვილმა.

მათი განმარტებით, პროექტი ორწლიანია, თანადაფინანსებით ხორციელდება და მისი ჯამური ღირებულება 2 947 999 ლარს შეადგენს.

სოფელ მცხეთიჯვრიდან წაღვლამდე გზის მოასფალტების პროექტი მნიშვნელოვანია იმიტომაც, რომ ხაშურის მუნიციპალიტეტის ე.წ. გამყოფი ხაზის მიმდებარე სოფლების მცხოვრებლებს საყოფაცხოვრებო პირობები მკვეთრად გააუმჯობესდებოდა. პროექტის ფარგლებში, 3 კილომეტრნახევრიანი ასფალტის საფარი დაიგება.



(გაგრძელება)

20-30-იანი წლებიდან, აქ საქალაქო მეურნეობა სწრაფად წავიდა წინ, რამაც ხელი შეუწყო ხაშურის გადაქცევას რაიონულ ცენტრად. მისი უბნები გახდნენ წარსულში ცნობილი სოფლები შინდარა, გორათი და ზემო ჭალა.

ხაშური ისტორიულ სურამის ჭალაში, მდ. სურამულას სანაპიროზე, საკუთრივ ხაშურის ჭალაში მდებარეობს.

სულხან-საბა ორბელიანი სიტყვა „ხაშურს“ ასეთ განმარტებას აძლევს: „მლაშე წყლის მარილი, ვინა, რაც წყლის და ტბისაგან მარილის მსგავსი რამ გამოვა: შაბი, ბავრუკი, გვარჯილა და მისთანანი, მათ ნიშანს ეწოდებიან“.

ხაშურს ასეთივე მნიშვნელობით განმარტავენ იოანე ბატონიშვილი, ნიკო ჩუბინაშვილი და სხვა ლექსიკოგრაფები. „ქართული ენის განმარტებითი ლექსიკონშიც“ ასევეა ასხნილი ეს სიტყვა.

ამრიგად, ხაშური მლაშე წყლის ან ტბის აორთქლების, დაშრობის შედეგად დარჩენილ მარილს ჰქვია. აგრეთვე, მლაშე, მარილიან მიწას. ამრიგად, თვისებიდან გამომდინარე, ხაშური შეიძლება ერქვას იმ ადგილსა თუ ტერიტორიას, სადაც წყლები და ნიადაგი მლაშეა.

ასეთი თვისების მატარებელი ადგილები ხაშურს ჩრდილოეთის მხრიდან აკრავს, ე.წ. ზემო სერის სახით, რომელსაც კაკალათხევის სერსაც უწოდებენ. მისი მიდამოები, მათ შორის საკუთრივ ქალაქის ტერიტორია, ცნობილია მლაშე წყლებით, თვით ნიადაგიც მარილიანია. აქვე მოედინება ცნობილი „ღარიბა-ღელე“, რომლის წყალიც მარილიანი და მლაშეა. სწორედ ამის გამო, როგორც ჩანს, ჯერ ამ მიდამოებს, ხოლო შემდეგ დასახლებულ ადგილსაც შეერქვა ხაშური.

საყურადღებოა, რომ სპარსულ ენაში არის სიტყვა „ხაქეშურ“ - ი, რომელიც ძალიან წააგავს ქართულ ხაშურს და ითარგმნება, როგორც მლაშე მიწა. „ხაქე“ - ს მნიშვნელობა ლექსიკოლოგ მღაფარეის მიხედვით, არის გვამი, მტვერი, ნაგავი, ნიადაგი, მიწა, ქვეყანა, საფლავი, ხოლო „შურ“ - ის მლაშე, გადამლაშებული, მღელვარება, სიფიცხე, არეულობა.

უნდა ვიფიქროთ, რომ სპარსული „ხაქეშური“ და ქართული „ხაშური“ ერთმანეთის იდენტური და ერთი შინაარსის მატარებელია. ქართული „სპარსული სამყაროს სიახლოვე გვაოქივნიებს, რომ ეს სიტყვა ქართულში სპარსულიდან შემოვიდა და დამკვიდრდა, მაგრამ აქვე ისიც უნდა შევნიშნოთ, რომ ხაშურის სახელწოდებით ცნობილი დასახლებული ადგილებია (ქალაქებია) ბასკეთში (ესპანეთი), კაბადოკიაში (თურქეთი) და სხვაგან. ისიც უნდა აღვნიშნოთ, რომ ძველი შუმერული სამყარო იცნობს ხაშურის სახელწოდებით მთიანეთს.

ხაშური პირველად 1693 წლის დოკუმენტში გვხვდება. დედოფალი ელენე მამულების წყალობის სიგელს უახლებს და ხელმეორედ უმტკიცებს აბაზაძის გვარს. ამ მამულებს შორისაა დასახლებული „ხაშურს ჩაჩანდისეული მამული“, რომელიც აბაზაძეების გვარს მანამდე ჰქონდა სამეფო კარისაგან წყალობის სახით მიღებული.

ერეკლე პირველის (ნახარალიხანი) 1700 წლის ბრძანებით ხაშურლებსა და გორათელებს ეკრძალებოდათ სურამლების დაუკითხავად მათი მამულების მოხვნა, დათესვა და მითვისება.

ხაშურის მუნიციპალიტეტის ისტორია ტოპონიმებში

რუისის სამწყსოს 1715 წელს დაეთრის მიხედვით, აქ 15 კომლი ცხოვრობს (ბექუტაშვილი, ოძქელი, გივიშვილი (2), ქუზიაშვილი, აქიმაშვილი, ალექსიშვილი, ინდიშვილი (2), შოშიტაშვილი, აბიაშვილი (2), მალიძე...

1724 წელს ელიზბარ აიდანაშვილს „ხაშურის ბოლოს“ ახალდაბელი გაბრიელ ქიმერიძისთვის მიუყიდა მიწა. ასე უნდა ჩაეროდა საფუძველი დღევანდელ ქიმერიძეების უბანს ხაშურში.

1728 წელს თბილისის ვილაიეთის დიდ დავთარში ნათქვამია, რომ „სოფელი ხაშური ახლოსაა სოფელ გორათთან“. აქ დაფიქსირებულია 15 კომლი მოსახლე. მიწაზე გადასახდი შეადგენს 50 ახნას, ველზე კი - 20 ახნას. დანარჩენი გადასახადებია: ისფინჯი კაცი 15, ახნა 1800; ხორბალი ქილა 100, ახნა 2000; ქერი ქილა 60, ახნა 900; ჭვავი ქილა 20, ახნა 300; ფეტვი ქილა 30, ახნა 450; უშრის გადასახადი ვენახზე დონუმი 40, თითოეულზე 40, ახნა 160; გადასახადი ერბოზე 120; გადასახადი სკაზე 90; გადასახადი ცხვარზე 150; არუსენას გადასახადი 120; დემთობანი, მიწაზე თაფუს გადასახადი 90; გადასახადი ღორზე 90; წისქვილი თვალი 1 სრული წლით, გადასახადი 120. ჯამი 8020 ახნა.

ვახუშტი ბატონიშვილი იცნობს ხაშურს. იგი აღნიშნავს: „ოსიაურს ზეით, ხაშურს, ერთვის სურამის-წყალს ქემერტის-წყალი, აღმოსავლიდამ“. ასევე აქვს დატანილი ხაშური რუკაზეც.

იოანე ბატონიშვილი თავის „აღწერაში“ ხაშურს აფიქსირებს როგორც მოსახლე სოფელს, ხოლო „კალმასობაში“ „საშუალო სოფელს“ უწოდებს.

ხაშურში მამულები ეკუთვნოდათ ხიდრბეგიშვილებს, მურვანიშვილებს და სხვებს.

XVIII ს-ის მეორე ნახევრიდან ხაშური უკვე არაერთ დოკუმენტშია მოხსენებული.

XIX ს-ის პირველ ნახევარში ხაშური მხარის პოლიტიკურ, ეკონომიკურ და კულტურულ ცხოვრებაში ნაკლებ როლს თამაშობს, შეიძლება ითქვას, რომ ეს როლი შეუმჩნეველიც კია. იგი სოფელ ზემო ჭალის სასოფლო საზოგადოებაში შედის.

1865 წლის აღწერით, აქ 45 კომლი მოსახლეა, რომელშიც სახელმწიფო გლეხია 26, ხოლო საეკლესიო - 2, დანარჩენი - 17 დროებით ვაღდებულია.

XIX ს-ის 70-იანი წლებიდან ხაშური სწრაფად წინაურდება. აქ 1872 წელს გავიდა ფოთი-თბილისის რკინიგზა, აიგო რკინიგზის მთავარი სახელოსნოები. სწრაფი ტემპით განვითარდა ვაჭრობა. სურამის სარკინიგზო გვირაბის გაყვანის შემდეგ ხაშური ქალაქური ტიპის დასახლებად გადაიქცა. გაიზარდა მოსახლეობაც.

1886 წელს აქ უკვე 442 კომლი მოსახლეა. თუ მანამდე მოსახლეობა, ეროვნული თვალსაზრისით, ერთფეროვანი იყო, ახლა აქ სხვადასხვა ეროვნების წარმომადგენლებიც სახლობენ: რუსები, სომხები, გერმანელები და სხვა.

1872 წლიდან ხაშურს, დიდი მთავრის, მიხეილ ნიკოლოზის ძის კავკასიაში მოღვაწეობის 10 წლისთავის აღსანიშნავად „მიხაილოვო“ ეწოდა. 1918 წლიდან მას კვლავ ხაშური, ხოლო 1928-1934 წლებში „სტალინისი“ ჰქვია. შემდეგ კვლავ - ხაშური.

1917 წლიდან ხაშური ქალაქია. თამაზ ლაცაბიძე

(გაგრძელება იქნება)

16 სექტემბერს, ახალი სასწავლო წელი სკოლამდელი აღზრდის დაწესებულებებშიც დაიწყო. ხაშურის მუნიციპალიტეტის საბავშვო ბაღების გაერთიანებაში ძალ-ღონეს არ იშურებენ ჯანსაღი სასწავლო პროცესი მიმდინარეობდეს სააღმზრდელო დაწესებულებებში. როგორც ჩვენი გაზეთის ნომრებიდან შეიტყუეთ ბაღების გაერთიანებას, აგვისტოს თვიდან, თათია ბროლიძე ხელმძღვანელობს, რომელიც სიამოვნებით დავგთანხმდა ინტერვიუს, რათა ბაღებში მიმდინარე პროცესებზე ჩვენთვის მოეთხრო. ჩვენ ვიმედოვნებთ, რომ ახალი, მოტივირებული და ენთუზიასტი მმართველის პირობებში, საბავშვო ბაღებში სააღმზრდელო პროცესი უფრო გაუმჯობესდება და ინფრასტრუქტურაც მთლიანად მიუახლოვდება ევროპულს.

თათია ბროლიძე: - პირველ რიგში, მინდა, ახალი სასწავლო წლის დაწყება მივულოცოთ ჩვენს პატარებს, მათ მშობლებს, სკოლამდელი აღზრდის დაწესებულების თანამშრომლებს. ვუსურებ მათ წარმატებულ მოღვაწეობას. რაც შეეხება მიზანს, როგორც მმართველის, არის თანამედროვე და ინოვაციური გარემოს შექმნა სკოლამდელი აღზრდის დაწესებულებებში, აგრეთვე, უსაფრთხოებასა და ჯანმრთელობის დაცვაზე ზრუნვა, ჩვენი მთავარი მიზანია ბავშვები მოვამზადოთ სკოლებითვის, საფუძველი ჩაუყაროთ სამომავლოდ მაღალი დონის მქონე პიროვნებების ჩამოყალიბებას.



- რამდენი ბავშვი იწყებს ფუნქციონირებას ახალი სასწავლო წლიდან და რამდენი აღსაზრდელით?

- ახალი სასწავლო წლიდან, 18 საბავშვო ბავშვი იწყებს ფუნქციონირებას, მათ შორისაა, სამი რეაბილიტაციული ბავშვი: სატივის, ტეზრის და შუშის ქარხნის. მიმდინარე პერიოდში დარეგისტრირებულია, დაახლოებით, 2015 აღსაზრდელი. - როგორც აღნიშნეთ, სამი უახლესი ბავშვი იწყებს ფუნქციონირებას, მოგვიყვით უფრო ვრცლად მათ შესახებ. - სიამოვნებით. სოფელ ტეზერში საბავშვო ბავშვი ათწლეულია არ ყოფილა, ფუნქციონირებდა მხოლოდ ალტერნატიული სააღმზრდელო დაწესებულება, რომელიც, რა თქმა უნდა, ოჯახებისთვის დამატებით ხარჯებთან იყო დაკავშირებული. ადგილობრივთა საჭიროებებიდან გამომდინარე, ხაშურის მუნიციპალიტეტის მერიამ შეიძინა ფართი და თანამედროვე სტანდარტების დაცვით აშენდა უახლესი საბავშვო ბავშვი, რომელიც ადგილობრივი ბიუჯეტიდან დაფინანსდა, ჯამური ღირებულება კი - 95 998 ლარია. ახალი საბავშვო ბავშვი აშენდა, აგრეთვე, შუშის ქარხნის დასახლებაში. ახალი სასწავლო წლიდან, საკმაოდ მჭიდრო დასახლებას, ახალი საბავშვო ბავშვი ექნება. აღნიშნული მშენებლობის

მუნიციპალიტეტის სკოლამდელი აღზრდის დაწესებულებები ახალ სასწავლო წელს სრულ მზადყოფნაში შეხვდნენ

პროექტი თანადაფინანსებით განხორციელდა და 533 000 ლარი შეადგინა. საბავშვო ბავშვი გაიხსნა აგრეთვე, დიდ სატივეში, რომლის ბიუჯეტი 44 133 ათასი ლარია, მისი მშენებლობაც ადგილობრივი ბიუჯეტიდან და სოფლის განვითარების პროექტით განხორციელდა. აქვე, ვისარგებლებ შემთხვევით და მივმართავ გომის საბავშვო ბავშვის აღსაზრდელთა მშობლებს, რომ 1 ოქტომბრამდე, რემონტის გამო, გადაიდება სასწავლო პროცესი.

- კვება ბაღებში ერთ-ერთი მნიშვნელოვანი საკითხია, რამდენად ჯანსაღი პროდუქტებით მარაგდება ბაღები?

- საბავშვო ბაღებში, ცხადია, ხარისხიანი პროდუქტების მიწოდება ხდება. ჩვენი მხრიდან, მუდამ გაკონტროვდება ეს საკითხი და დავამკვიდრებთ უმაღლეს სტანდარტს. რაც შეეხება ტენდერს გამარჯვებულებს, ესენია: ბაღებს ხორცპორუქტებით მოამარაგებს შპს „ჯეო-ფუდი“ და პურზე - შპს „ოსხენელი და ვაჭები“, დანარჩენ პროდუქტებზე - იმ მამუკა ჭადაშვილი.

- რამდენად კვალიფიციური კადრები მუშაობენ საბავშვო ბაღებში?

- მინდა გითხრათ, რომ საკმაოდ კვალიფიციური კადრები გვყავს, სააღმზრდელო დაწესებულებებში. კადრებს გავლილი აქვთ შემდეგი ტრენინგები: ყველა აღმზრდელს - „სკოლამდელი ღირებულებების მართვა და თანამედროვე სტანდარტები“, აგრეთვე „სკოლისათვის მზაობის პროგრამის ანალიზი და სტანდარტები“, ექსტრემი და მზარეულებმა გაიარეს „ჯანსაღი კვების ორგანიზება სკოლამდელ დაწესებულებებში“, ყველა მეთოდისტმა გაიარა „აღმზრდელ-პედაგოგთა პროფესიული განვითარების ტრენინგ-მოღვაწეობა“. მეთოდისტებმა თბილისში გაიარეს ტრენინგ-კურსები ყველა დანარჩენმა კი - ადგილობრივად. თ. ახალკაცი



სურათზე: ტეზერში ახალი საბავშვო ბავშვის გახსნა აღსაზრდელს მუნიციპალიტეტის ხელმძღვანელებმა მიულოცეს.

მუნიციპალიტეტის სკოლებში 645 პირველკლასელი დაიწყებს სწავლას




ლამაზები, ლაღები, ბედნიერები, მსიარულები... უყურებ ამ პატარებს და მათთან ერთად შენც გიხარია. ქვეცნობიერად გადადიხარ წლების იქით და მათსავით პატარა ხდები. მინდა ყველას მოეფერო, განსაკუთრებით კი პირველ მასწავლებლებს, რომელიც ყველაზე მაგარ, ყველაზე მცოდნედ მიგაჩნია და სულ მის გვერდით გინდა ყოფნა. თუმცა, რატომ მიგაჩნია? ასეცაა და ამ აქსიომას ვერაფერი შეცვლის. ის, დედისთვის შემდეგ ყველაზე თბილი, ყველაზე ახლობელი ხდება პირველი წუთიდანვე და ძალიან დაცულად და ბედნიერად გრძნობ თავს მის გვერდით...

და იხსენება მათთვის ცოდნის კარი. კი, ჯერ თამაში ურჩევნიათ სწავლას, ჰოდა სასწავლო პროცესიც ისეა აგებული, თამაშ-თამაშით მიიწვევენ წინ და ძალიან ბედნიერები არიან, როცა ამ თამაშში მათი პირველი მასწავლებლებიც არიან ჩართულნი.

645 ახალწვეული ჰყავს ჩვენს სკოლებს, რომლებმაც პირველად შეადგეს სკოლის კარი. თითოეულ მათგანს პორტაბელური კომპიუტერი გადაეცა და სახელმძღვანელოებიც დაურიგდათ. წარმატებები ამ ბავშვებს და იმედია, მათგან ბევრი იქნება ისეთი, რომლის სახელიც მოელ ქვეყანას ეცოდინება.

სურათზე: ხაშურის პირველი საჯარო სკოლის პირველკლასელები.

- ქვიშის ჭიდაობა -



ლევან ქელესაშვილი მსოფლიო სერიის გამარჯვებულია

ხაშურის მუნიციპალიტეტის სასპორტო სკოლის აღზრდილი ლევან ქელესაშვილი (70 კგ) ქვიშის ჭიდაობაში მსოფლიოს სერიის ფინალური ეტაპის გამარჯვებული გახდა. ქართველმა ფალავანმა ოქროს მედლისათვის შეხვედრაში უკრაინელი რადულოვი 4-2 დაამარცხა, მანამდე კი სერბ დუკანოვიჩს, უკრაინელ იეშენკოს და ამერიკელ პეტერსს ერთნაირი ანგარიშით 3-0 მოუგო.

ბავშვთა და მოზარდთა შემოქმედებითი განვითარების ცენტრი იწყებს მოსწავლეთა რეგისტრაციას

ბავშვთა და მოზარდთა შემოქმედებითი განვითარების ცენტრი იწყებს მოსწავლეთა რეგისტრაციას მიმდინარე წლის 16 სექტემბრიდან 1 ოქტომბრამდე 10.00 საათიდან 17.00 საათამდე შემდეგ წრეებზე: ვოკალური მუსიკა; კლასიკური და პოპულარული მუსიკა; ქართული ცეკვა; ხატვა; რელიგია და ისტორიული ძეგლები; ტექნიკური და ზოგადი უნარები; უცხო ენა (ინგლისური); მკითხველთა კლუბი; ხალხური რეწვა (თექვა); ხალხური რეწვა (ქარგვა); გიტარა; მხატვრული კითხვის და ნორჩ შემოწმებლთა წრე.

რეგისტრაციისთვის წარმოადგინეთ შემდეგი დოკუმენტები: განცხადება (შეივსება ადგილზე) მოსწავლის დაბადების მოწმობა (ასლი) მშობლის პირადობის მოწმობის (ასლი) მისამართი: კოსტავას ქ.#11 ტ: 24 28 57



- სამბო -

დიმიტრი მუდაძე მსოფლიო ჩემპიონატის საკვალიფიკაციო ტურნირზე იასპარეზებს



ამ დღეებში, გაიმართა არჩილ ჩოხელის სახელობის საერთაშორისო ტურნირი ჭიდაობა სამბოში, სადაც ბრწყინვალედ იასპარეზა შინაგან საქმეთა სამინისტროს საგანგებო სიტუაციების მართვის სამსახურის ხაშურის განყოფილების მეხანძრე-მაშველმა დიმიტრი მუდაძემ, რომელმაც 52 კილოგრამ წონით გატეგორიაში ყველა მეტოქე დაამარცხა და ჩემპიონი გახდა. აღსანიშნავია, რომ იგი, უახლოეს მომავალში, მსოფლიო ჩემპიონატის საკვალიფიკაციო ტურნირზე გამოვა. იმედია, არც აქ შეირცხვენს თავს და ხაშურის საჭიდაო სკოლის ტრადიციებს ღირსეულად გააგრძელებს.

წარმატებები დიმიტრის!

სტუდენტთა საყურადღებოდ!

ხაშურის მუნიციპალიტეტის მერია გვგმავს ხაშურის მუნიციპალიტეტის ტერიტორიაზე მცხოვრები იმ სტუდენტების დაჯილდოებას, რომლებმაც 2019 წელს წარმატებით ჩააბარეს ერთიანი ეროვნული გამოცდები და მიიღეს 100%-იანი გრანტი (არ იგულისხმება უფასო ფაკულტეტები და ჩაბარების შემდგომ მოპოვებული შიდა გრანტი).

დაინტერესებულ პირებს გთხოვთ, წარმოადგინოთ შემდეგი დოკუმენტაცია: პირადობის მოწმობის ასლი; შეფასებისა და გამოცდების ეროვნული ცენტრის მიერ გაცემული ცნობა 100%-იანი სახელმწიფო გრანტის მოპოვების შესახებ; საბანკო ანგარიშის ნომერი.

საკონტაქტო პირი: ნინო ღონდაძე
ტელ: 577951784 (0368)24 24 56
დოკუმენტაცია მიიღება მიმდინარე წლის 23 სექტემბრის ჩათვლით.
მუნიციპალიტეტის განათლების, კულტურისა და სპორტის სამსახური

D იყიდება სახლი

ხაშურში (თაყაიშვილის ქ. №9 – ყოფილი ტელმანის ქუჩა, მესამე საჯარო სკოლის გვერდით) იყიდება ორსართულიანი სახლი ეზოთი და ყველანაირი სათავსოთი. ფასი შეთანხმებით. T 593-16- 90-48 (ლია).

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.
E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.
D-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.